

Seulle ne peut donner repos,
 Mais pour achever mon propos,
 Je voudroys estre ensevely
 Après avoir d'elle cueilli
 Un seul baiser.

CARLIN.

C'est peu de chose,
 Dis moi son nom ?

GUIOT.

Son nom ? je n'ose
 Tant de peur se mesle parmy
 Mon amitié !

CARLIN.

A ton amy ?

GUIOT.

Amy ny ha tel que soy mesme

CARLIN.

As tu peur que le bruict se seme
 De ceci ? Guiot tu scais bien
 Que je t'ayme.

GUIOT.

Mais cest grand bien
 De couvrir toujours ses secrets.

CARLIN.

Ouy fors aux amys discrets,
 Et je suis la fleur de ceux là.

GUIOT.

Je ne diray jamais cela :

CARLIN.

Et bien et si je le devine ?

GUIOT.

Alors comme alors.

CARLIN.

Est-ce Andrine,
 La bergère tant fresche et gaye ?